



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH”, broj: 95/12 i 41/16), člana 25. Pravilnika o godišnjim finansijskim izvještajima političkih stranaka (“Službeni glasnik BiH”, broj: 96/13 i 89/16), a u skladu sa članom 12. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2015. GODINU **NARODNE STRANKE RADOM ZA BOLJITAK**

SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1. NALAZI.....	5
5.2. PREPORUKE.....	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Narodne stranke Radom za boljitak za 2015. godinu.

Rukovodstvo stranke je odgovorno za finansijske izvještaje, postupanje u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskog izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2015. godinu, utvrđeno je da je Narodna stranka Radom za boljitak prekršila odredbe člana 5. stav (4), člana 6. stav (3), člana 11. i člana 12. Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled finansijskih izvještaja Narodne stranke Radom za boljitak za 2015.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Narodna stranka Radom za boljitak se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	17.910,00	5,79
3.	Prilozi pravnih lica (3-b)	0,00	0,00
4.	Prihodi od imovine (3-c)	863,24	0,28
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	2.760,00	0,89
7.	Prihodi iz budžeta (3-f)	288.052,84	93,04
8.	Prihodi od propagande (3-g)	0,00	0,00
9.	Ostali prihodi	0,00	0,00
I	Ukupni prihodi (1-9)	309.586,08	100,00
II	Kreditno zaduženje kod banaka	0,00	0,00
	Izvori finansiranja (I+II)	309.586,08	100,00

Prema podacima iz godišnjeg finansijskog izvještaja, Narodna stranka Radom za boljitak je iskazala rashode u ukupnom iznosu od 130.301,30 KM.

2. PREDSTAVLJANJE POLITIČKE STRANKE

Naziv političke stranke: Narodna stranka Radom za boljitak. Skraćeni naziv je: Za boljitak.

Stranka je registrovana kod Kantonalnog Suda u Sarajevu, rješenjem broj: R 30/01 i dopunom rješenja broj: R-I-8/04 i R-I-5/05 od 28.06.2005. godine, sa sjedištem u Sarajevu, ulica Kranjčevićeva broj 41. Rješenjem Općinskog suda u Sarajevu broj: 065-0-F1-11-000003 od dana 03.06.2011. godine i rješenjem Općinskog suda u Širokom Brijegu broj: 064-0-F1-15-000001 od dana 30.12.2015. godine upisana je promjena adrese sjedišta stranke.

Sjedište stranke je u Širokom Brijegu, ulica Dr. Ive Pilara br.5.

Lice ovlašteno za zastupanje stranke je Mladen Ivanković-Lijanović, predsjednik stranke.

Lice ovlašteno za podnošenje finansijskih izvještaja stranke za 2015. godinu je Mirjana Šakota.

Prema podacima iz godišnjeg finansijskog izvještaja za 2015. godinu, organizacionu strukturu Narodne stranke Radom za boljitak čine:

- Središnji ured,
- 10 kantonalnih odbora,
- 6 regionalnih odbora,
- Gradski odbor Mostar,
- Odbor Brčko Distrikt i
- 121 općinski odbor.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Narodne stranke Radom za boljitak za 2015. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Narodne stranke Radom za boljitak obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica i prihode iz budžeta.

4. PRETHODNE KONTROLE I REVIZIJE

Služba za reviziju je izvršila pregled i reviziju finansijskih izvještaja Narodne stranke Radom za boljitak u periodu od 2005. do 2014. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama političkoj stranci.

Nakon izvršene revizije godišnjeg finansijskog izvještaja za 2014. godinu, izdat je izvještaj o reviziji sa nalazima revizije i preporukama stranci da članarine i donacije prikupljene putem blagajne uplaćuje na transakcijski račun stranke u roku od 10 dana i za iste izdaje potvrde o prijemu, da vodi evidencije o primljenim donacijama, da poslovne knjige vodi u skladu sa zakonskim propisima, odnosno da vodi adekvatne evidencije o svojim rashodima i obavezama i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke

Na osnovu uočenih nedostataka u godišnjem finansijskom izvještaju za 2015. godinu, utvrđeno je da Narodna stranka Radom za boljitak nije ispoštovala sve date preporuke.

5. NALAZI I PREPORUKE

5.1. NALAZI

a) Narodna stranka Radom za boljitak prekršila je odredbu člana 5. stav (4) Zakona o finansiranju političkih stranaka.¹

Stranka nije u poslovnim knjigama i finansijskom izvještaju evidentirala nenovčane donacije po osnovu besplatnog korištenja poslovnih prostora, čime je prekršila odredbe člana 5. stav (4) Zakona o finansiranju političkih stranaka.

- Općinski odbor Narodne stranke Radom za boljitak Zavidovići koristio je poslovni prostor u vlasništvu Općine Zavidovići², površine 22,87 m², bez naknade.

¹ Političke partije dužne su da vode evidenciju o prijemu članarina i dobrovoljnih priloga, te da izdaju potvrde o prijemu članarina i dobrovoljnih priloga. Ovlašćeno lice u političkoj partiji uplaćuje članarinu i dobrovoljne priloge neposredno na transakcijski račun političke partije najkasnije u roku od 10 dana od dana prijema uplate.

² Akt Općine Zavidovići, broj: 06-31-18-167/16 od 10.06.2016. godine.

- Općinski odbor Narodne stranke Radom za boljitak Jablanica koristio je poslovni prostor u vlasništvu Općine Jablanica³, površine 13,75 m², bez naknade.
- Općinski odbor Narodne stranke Radom za boljitak Hadžići je na osnovu Odluke o dodijeli na korištenje poslovnih prostorija, koristio poslovni prostor Općine Hadžići⁴, bez naknade.

Narodna stranka Radom za boljitak je korištenjem poslovnih prostora u vlasništvu općina bez plaćanja zakupnine, ostvarila nenovčane donacije, koje je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2015. godinu.

b) Stranka je prekršila odredbe člana 6. stav (3)⁵ Zakona o finansiranju političkih stranaka.

Pregledom godišnjeg finansijskog izvještaja je utvrđeno da je Narodna stranka Radom za boljitak primila donaciju od fizičkog lica, koja prelazi zakonom propisani limit, čime je prekršila odredbe člana 6. stav (3) Zakona o finansiranju političkih stranaka. Kontrolom izvoda sa transakcijskog računa stranke, utvrđeno je da je fizičko lice Ivanković Lijanović Mladen uplatio donaciju stranci dana 27.05.2015. godine u iznosu od 15.000,00 KM, i ista prelazi zakonom propisani limit za 5.000,00 KM⁶.

c) Stranka je prekršila odredbe člana 11.⁷ i člana 12. stav (1)⁸, stav (3)⁹ i člana 12. stav (5)¹⁰ Zakona o finansiranju političkih stranaka.

Na osnovu obavljenog pregleda, utvrđeno je da Narodna stranka Radom za boljitak nije uspostavila potpune i tačne evidencije o svojim prihodima, rashodima i obavezama i nije finansijski izvještaj podnijela u formi koju je propisala Centralna izborna komisija Bosne i Hercegovine, čime je prekršila odredbe člana 11. i člana 12. stav (1) i stav (3) Zakona o finansiranju političkih stranaka i odredbe Pravilnika o godišnjim finansijskim izvještajima političkih stranaka-u daljem tekstu: Pravilnik.

- Stranka u poslovnim knjigama i godišnjem finansijskom izvještaja, koji je podnijela Centralnoj izornoj komisiji BiH, nije iskazala nenovčane donacije po osnovu korištenja poslovnih prostora bez naknade u vlasništvu Općine Zavidovići, Općine Jablanica i Općine Hadžići, niti je iskazala troškove zakupa poslovnih prostora, čime je prekršila odredbe člana 13., člana 18., člana 21. i člana 22. Pravilnika.
- Općinski odbor Stranke Radom za boljitak Tuzla, koristio je poslovni prostor Grada Tuzla¹¹ površine 68,87 m² uz ugovorenu cijenu mjesečnog zakupa od 80,34 KM, odnosno 964,08 KM godišnje. Stranka je troškove zakupa iskazala u iznosu od 883,74 KM, što je za 80,34 KM manje u odnosu na ugovorenu cijenu zakupa.

³ Akt Općine Jablanica, broj: 01-25-4-1858/16 od 13.06.2016. godine.

⁴ Akt Općine Hadžići, broj: 08-49-5576/16 od 20.06.2016. godine.

⁵ Ukupan iznos dobrovoljnih priloga fizičkog lica jednoj političkoj partiji ne smije prelaziti iznos od 10.000,00 KM u kalendarskoj godini („Službeni glasnik BiH“, broj: 95/12 i 41/16).

⁶ Izvod broj 82. sa transakcijskog računa, broj: 33882202200693088 kod UniCredit banke.

⁷ Politička partija dužna je da vodi poslovne knjige.

⁸ Politička partija vodi evidenciju o svojim prihodima i rashodima.

⁹ Do 31. marta naredne godine politička partija podnosi finansijski izvještaj u formi koju odobri Centralna izborna komisija BiH („Službeni glasnik BiH“, broj: 95/12 i 41/16).

¹⁰ Sva lica koja su dužna da podnesu izvještaj moraju podnijeti i dodatne izvještaje („Službeni glasnik BiH“, broj: 95/12 i 41/16).

¹¹ Akt Grada Tuzla, broj: 04-495/16 od 14.06.2016. godine.

- Dana 20.07.2016. godine, Centralna izborna komisija Bosne i Hercegovine je stranci uputila Zahtjev za dostavljanje dodatne dokumentacije za 2015. godinu¹², kojim je od stranke pored ostalog zatraženo da dostavi izvode otvorenih stavki na dan 31.12.2015.godine za sljedeće dobavljače: Holiday Inn, KJP ZOI 84 Olimpijski centar Sarajevo, Hotel Mujić d.o.o, Laktat d.o.o Posušje, Cab Club Zagreb i Vemos Company d.d.

S obzirom da stranka nije postupila u skladu sa zahtjevom Centralne izborne komisije Bosne i Hercegovine, odnosno nije dostavila izvode otvorenih stavki za navedene dobavljače, prekršila je odredbe člana 12. stav (4) Zakona o finansiranju političkih stranaka, što ukazuje da stranka nije vršila usklađivanje svojih obaveza na dan 31.12.2015. godine, što je bila dužna po osnovu Zakona o računovodstvu i reviziji Federacije BiH¹³.

d) Bez kvalifikovanja revizijskog mišljenja, skrećemo pažnju na izmirivanje obaveza stranke putem ugovora o cesijama i ugovora o preuzimanju duga.

Kontrolom dokumentacije Narodne stranke Radom za boljitak za 2015. godinu, utvrđeno je da je stranka obaveze prema dobavljačima u iznosu od 36.072,28 KM izmirila na osnovu ugovora o preuzimanju duga i cesijama sa pravnim licima koja su u bliskoj vezi sa porodicom Lijanović ili u njihovom vlasništvu.

Uvidom u ugovor o preuzimanju duga, broj: ZB-02-00-004/15 od 20.01.2015. godine, utvrđeno je da su obaveze Narodne stranke Radom za boljitak prema pravnom licu „Europlakat BH“ d.o.o. izmirene na osnovu ugovora o preuzimanju duga sa pravnim licem „Auto Lijanović“ d.o.o.“ Bišće polje, Mostar u iznosu od 34.597,47 KM.

Uvidom u ugovor o cesiji broj: JN-02-01-155/15 od 17.02.2015. godine cedent „MTH Jožići“ d.o.o. Široko Brijeg ustupio je svoja potraživanja od Narodne stranke Radom za boljitak pravnom licu „JN Junita“ d.o.o. u iznosu 347,90 KM. Ugovorom o cesiji broj: JN-02-01-04/15 od 09.02.2015. godine, cedent „Avaz“ d.o.o. ustupio je svoja potraživanja od Narodne stranke Radom za boljitak pravnom licu „JN Junita“ d.o.o. u iznosu od 370,50 KM. Ugovorom o cesiji broj: AM-00-02-48/15 od 15.04.2015. godine cedent „Braća Mujić Export-Import“ d.o.o. ustupio je svoja potraživanja od Narodne stranke Radom za boljitak pravnom licu „Alpen Mit“ d.o.o. u iznosu od 196,56 KM. Ugovorom o cesiji broj: JN-02-01-174/15 od 15.04.2015. godine, cedent „Braća Mujić Export-Import“ d.o.o. ustupio je svoja potraživanja od Narodne stranke Radom za boljitak pravnom licu „JN Junita“ d.o.o. u iznosu od 559,85 KM.

5.2. PREPORUKE

Preporučuje se Narodnoj stranci Radom za boljitak da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da vodi evidencije o primljenim donacijama,*
- *da ne prima priloge preko dozvoljenog limita,*
- *da poslovne knjige vodi u skladu sa zakonskim propisima, odnosno da vodi adekvatne evidencije o svojim prihodima, rashodima i obavezama i*

¹² Zahtjev, broj: 03-07-6-357-2/16 od 20.07.2016. godine.

¹³ Član 28. Zakona o računovodstvu i reviziji Federacije BiH („Službene novine Federacije BiH“, broj: 83/09).

- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku, Narodna stranka Radom za boljitak je dostavila primjedbe na Preliminarni izvještaj o pregledu godišnjeg finansijskog izvještaja za 2015. godinu. Uz primjedbe su dostavljeni i dokazi, čime je stranka djelimično otklonila nedostatke koji su navedeni u finansijskom izvještaju.

Služba za reviziju je razmotrila dostavljene dokaze, uvažila argumentovane primjedbe stranke, pa je u skladu sa istima korigovala nalaze revizije.

Pomoćnik revizora

Mr.sc. Goran Cicović

Šef Službe za reviziju

Mr. sc. Hasida Gušić